

四庫全書

史部

欽定四庫全書

史部

資治通鑑後編卷一百六十八

詳校官檢討臣德生

編修臣裴謙覆勘

總校官進士臣朱鈐

校對官主事臣陳文樞

謄錄監生臣毛世德

欽定四庫全書

資治通鑑後編卷一百六十八

刑部尚書徐乾學撰

元紀十六 起旃蒙赤奮若正月盡疆  
國單閼十月凡二年

泰定帝

泰定二年春正月乙未以畿甸不登罷春畋 禁后妃

諸王駙馬毋通星術之士非司天官不得妄言禍福

敕御史臺選舉與中書會議以聞 中書省臣言江南

民貧僧富諸寺觀田土非宋舊置并累朝所賜者請仍舊制與民均役從之 以籍入巴爾斯濟蘇地賜故監察

御史觀音保索約勒哈迪密實妻子各十項 戊戌造

象輦藏布凌采降賜其酋班珠爾銀鈔幣帛 辛丑

懷王圖卜特穆爾出居于建康 甲辰奉安顯宗像于永

福寺給祭田百頃 廣西山獠為寇命所在有司捕之

庚戌詔諭宰臣曰向者珠爾罕楚古爾蘇及山後皆地

震內郡大小民飢朕自即位以來惟太祖開創之艱世

祖混一之盛與人民共享安樂常懷祇懼災沴之至莫測其由豈朕思慮有所不及而事或僭差故以此示儆卿等其與諸司集議便民之事其思自死罪始議定以聞朕將肆赦焉 閏月壬子朔詔赦天下除江淮創科包銀免被災地差稅一年 庚申修野狐嶺色 桑乾嶺道 丁卯中書省臣言國用不足請罷不急之費從之 壬申罷永興銀場聽民採鍊以十分之二輸官

罷松江都水庸田使司命州縣正官領之仍加兼知渠

堰事 癸酉作棕毛殿 丙子浙西道廉訪使言四方

代祀之使棄公營私多不誠潔以是神不歆格請慎擇之 山南廉訪使特穆爾請削降特克實所驟陞官

己卯階州土蕃為寇鞏昌總帥府調兵禦之 山東廉

訪使許思敬請頒族葬制禁用陰陽相地邪說 雄州

歸信諸縣大雨河溢被災者萬一千六百五十戶賑鈔

三萬錠 二月甲申祭先農 丙戌頒道經于天下名

山宮觀 丁亥平伐苗酋的娘率其十萬來降土官三

百六十人請朝湖廣行省請汰其衆還部令的娘等四  
十六人入覲從之 己丑加嗣漢三十九代天師張嗣  
成太玄輔化體仁應道大真人 庚寅熒惑辰星填星  
聚于畢 辛卯廣西徭潘寶陷柳城縣 己亥命西僧  
作燒壇佛事于延華閣 庚子姚煒以河水屢決請立  
行都水監于汴梁倣古法備捍仍命瀕河州縣皆官皆  
兼知河防事從之 丙午造玉御牀 戊申命道士祭  
五福太一神 三月癸丑修曹州濟陰縣河堤役民丁

一萬八千五百人 甲寅禁捕天鵝 辛酉咸平府清

河寇河合流失故道壞堤堰勅蒙古軍千人及民丁修

之 乙丑帝如上都 夏四月丁亥作吾殿 癸巳和

市牝馬有駒者萬匹敕宿衛馳馬散牧民間者歸官廐

飼之 丁酉濮州鄆城縣言城西堯冢上有佛寺請徙

之不報 丙午黠夷及蒐雁遮殺雲南行省所遣諭蠻

使者敕追捕之 丁未封后父浩里烏齊爾為威靖王

戊申鞏昌路伏羌縣大雨山崩 五月辛酉高麗國



王王章卒章之留京師也構萬卷堂於其邸招致名儒  
閻復姚燧趙孟頫虞集等與之遊處以考究自娛時有  
鮮卑僧上言帝師帕克斯巴製蒙古字以利國家乞令天  
下立祠比孔子有詔公卿耆老會議國公楊安普力主  
其說章謂安普曰師製字有功於國祀之自應古典何  
必比之孔氏孔氏百王之師其得通禮以德不以功後  
世恐有異論言雖不納聞者韙之科舉之設章嘗以姚  
燧之言白於仁宗許之及李孟執政遂奏行焉其端實

自章發也右丞相嚕罷帝欲以章為相章固辭曰臣  
小國蕃宣之寄猶懼不任乞付於子況朝廷之上相哉  
敢以死請帝笑曰固知渠善避權也性好賢疾惡尤喜  
談宋事嘗使僚佐讀東都事略至王旦李沆富弼韓琦  
范仲淹歐陽修司馬光諸傳必舉手加額以致景慕至  
丁謂蔡京章惇等傳未嘗不切齒憤惋及是卒于京邸  
賜謚曰忠宣

此事據高麗史修入

辛未遣察納使于周王和實

拉 丙子舒瑪爾節等以國用不足請減厯馬汰衛士及

節諸王濫賜從之 浙西諸郡霖雨江湖水溢命江浙

行省興役疏洩之 置諫議書院于昌平縣祀唐劉蕡

大都路檀州大水平地深丈有五尺汴梁路十五縣

河溢江陵路江溢 六月己卯朔皇子生命巫被除於

宮 葺萬歲山殿 癸未潯州平南縣徭為寇達嚕噶

齊都爾嘉都監姚泰亨死之 丙申中書參知政事左塔

卜台言大臣兼領軍衛前古所無特克實以御史大夫額

森特穆爾以知樞密院事皆領衛兵如虎而翼故成逆

謀今軍衛之職乞勿以大臣領之庶勲舊之家得以保全從之仍賜幣帛以旌其直 息州民趙丑廝郭菩薩妖言彌勒佛當有天下有司以聞命宗正府刑部樞密院御史臺及河南行省官雜鞠之 丁未立都水庸田使司浚吳松三江 通州三河縣大雨水丈餘 潼川府綿江中江水溢入城郭冀寧路汾河溢秦州秦安山移 秋七月庚戌遣阿爾薩巴祀宅神于北部行帳 甲寅寧珠許師敬編類帝訓成請於經筵進講仍俾皇太

子觀覽有旨譯其書以進 丙辰播州蠻黎平愛等集

羣夷為寇湖廣行省請兵討之不許詔播州宣撫使楊  
伊埒布哈招諭之 戊午遣使代祀龍虎武當二山

己未置車里軍民總管府以土人哈沙為總管佩金虎  
符 中書省臣言往歲征徭廉訪使劾其濫殺今凡出  
師請廉訪司官一員莅軍糾正從之 癸亥修大乾元

寺 廣西諸徭寇城邑遣湖廣行省左丞奇珠兵部尚  
書李大成中書舍人瑪魯將兵二萬二千人討之仍以

諸王烏爾圖罕監其軍 庚午以國用不足罷書金字

藏經 辛未立河南行都水監 申禁漢人藏執兵仗

有軍籍者出征則給之還復歸于官 壬午御史臺臣

言廉訪司蒞軍非世祖舊制賈胡鬻寶西僧修佛事所

費不貲於國無益並宜除罷從之 勅太傅托迪太保

圖古勒日至禁中集議國事 勅山東州縣收養流民

遺棄子女 是月宗仁衛屯田隕霜殺禾睢州河決

八月戊子修上都香殿 辛丑勅諸王私入京者勿供

其所用諸部曲宿衛私入京者罪之 衛輝路汲縣河  
溢 九月戊申朔分天下為十八道遣使宣撫詔曰朕  
祇承洪業夙夜惟寅凡所以圖治者悉遵祖宗成憲曩  
屢詔中外百司宣布德澤蠲賦祥刑賑恤貧民思與黎  
元共享有生之樂尚慮有司未體朕意庶政或闕惠澤  
未洽承宣者失於撫綏司憲者怠於糾察俾吾民重困  
朕甚愍焉今遣奉使宣撫分行諸道按問官吏不法詢  
民疾苦審理冤滯凡可以興利除害從宜舉行有罪者

四品以上停職申請五品以下就便處決其有政績尤異暨晦迹丘園才堪輔治者具以名聞太史院使齊履謙之江西福建宣撫黜罷官吏之貪汙者四百餘人蠲免括地虛加糧數萬石州縣有以先賢子孫充防夫諸役者悉罷遣之福建憲司職田每畝歲輸米三石民不勝苦履謙命准令輸之由是召怨及還京憲司果誣以他事未幾誣履謙者皆坐事免履謙始得直復為太史院使以郡縣饑詔運粟十五萬石貯瀕河諸倉以備



賑救仍勅有司治義倉募富民入粟拜官二千石從七  
品千石正八品五百石從八品三百石正九品不願仕  
者旌其門 己酉海運江南糧百七十萬石至京師  
癸丑帝至自上都 甲寅禁饑民結扁担社傷人者杖  
一百著為令 己未懷遠大將軍來安路總管岑世興  
上言自明其不反請置蒙古漢人監貳官優詔從之

丁丑浚河間陳玉帶河 禮部員外郎元永貞言特克實  
弒逆皆由特們德爾始禍請明其罪仍錄付史館以為

人臣之戒 漢中道文州霖雨山崩開元路三河溢

冬十月戊寅朔張珪歸保定上冢以病辭祿不允 卒

世興及子特穆爾率衆寇上林等州命撫諭之 癸未

以都爾蘇為御史大夫 翰林學士吳澄致仕先是澄

廟議不行已有去志會修英宗實錄命總其事居數月

實錄成未上即移疾不出中書左丞許思敬奉旨賜宴

國史院仍致朝廷勉留之意宴罷即出城登舟去中書

聞之遣官驛追不及而還言於帝曰吳澄國之名儒朝

之舊德今請老而歸不忍重勞之宜有所褒異詔加資  
善大夫仍以金織文綺二及鈔五千貫賜之 乙未皇  
后琳沁巴勒受佛戒于帝師 十一月戊申朔周王  
和實拉以豹來獻 庚戌舒瑪爾節以歲饑請罷皇后上  
都營繕從之 寧珠以病乞罷不允 丙辰郭菩薩等  
伏誅杖流其黨 丁巳幸大承華普慶寺祀昭獻元聖  
皇后于影堂賜僧鈔千錠 岑世興結八番蠻班光金  
等合兵攻石頭等寨勅調兵禦之八番宣慰使官以失

備坐罪 庚申倭舶來互市初成宗遣僧寧一山者加  
妙慈弘濟大師附商舶往使日本而日本人竟不至至  
是越二十餘年始有來互市者 壬戌勅軍民官蔭襲  
者由本貫圖宗支申請銓授 丙寅都爾蘇復為中書  
左丞相錄軍國重事 丁卯罷蒙山銀冶提舉司命瑞  
州路領之 十二月戊寅以達實特穆爾為中書右丞  
相錄軍國重事監修國史封薊國公 乙酉帝復受佛  
戒於帝師元起朔漠固已崇尚釋教及得西域世祖以



為字以賜蓋其重之如此其未至而迎之則中書大臣  
馳驛累百騎以往所過供億迎送比至京師則勅大府  
假法駕半仗以為前導詔省臺院官以及百司庶府並  
服銀鼠濟遜用每歲二月八日迎佛威儀往迓且命禮  
部尚書郎中專督迎接及其卒而歸葬舍利又命百官  
出郭祭餞大德九年專遣平章政事特穆爾來傳護送  
賻金五百兩銀千兩幣帛萬匹鈔三千錠皇慶二年加  
至賻金五千兩銀一萬五千兩錦綺雜綵共一萬七千

匹雖其昆弟子姓之往來有司亦供億無乏至是以帝  
師弟褒噶伊實戩將至詔中書持羊酒郊勞而其兄索  
諾木藏布遂尚公主封白蘭王賜金印給圓符其弟子之  
號司空司徒國公佩金玉印章者前後相望為其徒者  
怙勢恣睢日新月盛氣燄熏灼延於四方為害不可勝  
言 丁亥修鹿頂殿 鎮南王圖卜布哈薨遣中書平章  
政事奈瑪台攝鎮其地 中書省臣言山東陝西湖廣  
地接戎夷請議選宗室往鎮從之 申禁圖讖私藏不

獻者罪之 京師多盜癸巳達實特穆爾請處決重囚  
增調邏卒仍立捕盜賞格從之 甲午召張珪于保定  
壬寅中書左丞趙簡請行區田法於內地以宋董煟  
所編救荒活民書頒州縣 是歲御河水溢 廣西溪  
洞自岑世興而外諸徭所在為寇朝廷命行省督所屬  
討捕之尋遣使奉詔分諭或梗或降終未能悉平也

以故翰林學士布哈中政使布延圖指揮使布延呼喇勃  
為特克實等所繫死贈功臣號及階勲爵諡 都爾蘇密



專命令不使中外預知監察御史趙師魯上言古之人  
君將有言也必先慮之於心咨之於衆決之於故老大  
臣然後斷然行之渙若汗不可反未有獨出柄臣之意  
不咨衆謀者也不報都爾蘇雖剛狠亦服其敢言有朝  
士年未及致仕其子請預蔭其官而執政者為之地師  
魯駁其非事遂止 富珠哩弼以國子司業出為河南  
行省左右司郎中丞相曰吾得賢佐矣弼曰世祖立國  
成憲具在慎守足矣譬若乘舟非一人之力所能運也

腫乃開壅除弊省務為之一新 監察刺史李昌言臣  
嘗經平涼府靜會定西等州見西蕃僧佩金字圓符絡  
繹道路馳騎累百傳舍至不能容則假館民舍因迫逐  
男子姦汙婦女奉元一路自正月至七月往返者百八  
十五次用馬至八百四十餘匹較之諸王行省之使十  
多六七驛戶無所控訴臺察莫得誰何且國家之製圓  
符本為邊防警報之虞僧人何事而輒佩之乞更正僧  
人給驛法且令臺憲得以糾察不報 監察御史策丹

扈從至上都糾中書參知政事楊庭玉贓罪不報即納印還京師帝遣使追之俾復任即再上章劾廷玉鞠訊竟如其言又劾奏平章政事圖們岱爾入集賽之日英宗被弑必預聞其謀帝不省而贈圖們岱爾黃金繫腰策丹遂辭職改工部員外郎

三年春正月丙午朔播州宣慰使楊伊埒布哈招諭蠻酋黎平慶等來降 戊申元江路總管普雙叛命雲南行省招捕之 壬子封諸王庫春布哈為威順王鎮湖

廣邁努為宣靖王鎮益都 以山東湖廣官田賜民耕  
墾人三頃仍給牛具 徵前翰士學士吳澄不起 置  
都水庸田司于松江掌江南河渠水利 戊辰安南國  
阮叩冠思明路命湖廣行省督兵備之 二月丁丑購  
能首告謀逆厭魅者給賞立賞格諭中外 壬午廣西  
全茗州土官許文傑率諸徭以叛寇茗盈州殺知州事  
李德卿等命湖廣行省督兵捕之 丁亥中書省臣言  
請罷征徭勅諸王鄂爾多哈喇班師其鎮戍者如故 甲

午葺真定玉華宮 乙未修佛事厭雷于宗天門 丙

申建顯宗神御殿于盧師寺賜額曰大天源延壽寺

勅以金書西番字藏經 戊戌建殊祥寺于五臺山賜

田三百頃 甲辰帝如上都 歸德府屬縣河決民饑

賑糧五萬六千石 三月乙巳朔帝以不雨自責命審

決重囚遣使分祀五嶽四瀆名山大川及京城寺觀

丁未勅百官集議急務中書省臣等請汰衛士節濫賞

罷營繕防徭寇諸寺官署坑冶等事歸中書並從之

癸丑八番嚴霞洞蠻來降願歲輸布二千五百匹設蠻

夷官鎮撫之 乙卯申禁民間金龍文織幣 甲子命

功德使司簡歲修佛事一百二十七 丙寅翰林承旨

額哩音特穆爾許師敬譯帝訓成更名曰皇圖大訓敕授

皇太子 考試國子生 庚午填星太白歲星聚于井

辛未泉州民阮鳳子作亂寇陷城邑軍民官以失討

坐罪 癸酉懷王圖卜特穆爾子伊埒哲伯生是為寧宗

畿內河北山東諸路饑張珪赴召入見帝問曰卿來

時民間如何珪曰臣老矣少賓客不能遠知保定真定  
河間臣鄉里也民饑甚朝廷雖賑以金帛惠未及者十  
五六帝惻然命賑糧至是復令免三路及濟南等郡縣  
民租之半 夏四月丙戌鎮安路總管岑修廣為弟修  
仁所攻來告命湖廣行省辨治之 戊戌米洞蠻田先  
什用等結十二洞蠻寇長陽縣湖廣行省遣九姓長官  
彭呼圖克巴哈招之田先什用等五洞降餘發兵討之  
修夏津武城河堤二十三所役丁萬七千五百人 以

虞集為翰林學士兼國子祭酒集嘗因講罷論京師恃  
東南海運實竭民力以航不測非所以寬遠人而因地  
利也與同列進曰京師之東瀕海數千里北極遼海南  
瀕青齊荏葦之場也海潮日至淤為沃壤用浙人之法  
築堤捍水為田聽富民欲得官者合其衆分授以地官  
定其畔以為限能以萬夫耕者授以萬夫之田為萬夫  
之長千夫百夫亦如之察其惰者而易之一年勿征也  
二年勿征也三年視其成以地之高下定額於朝廷以



次漸征之五年有積蓄命以官就所儲給以祿十年佩  
之符印得以傳子孫如軍官之法則東方民兵數萬可  
以近衛京師外禦島夷遠寬東南海運以紓疲民遂富  
民得官之志而獲其用江海游食盜賊之類皆有所歸  
議者以為一有此制則執事者必以賄成而不可為事  
遂寢其後海口萬戶之設大畧宗之 五月乙巳修辰  
類佛事三十一所 罷造福建歲供蔗錫 以西僧馳  
驛擾民禁之從御史李昌奏也 甲子中書會歲鈔出

納之數請節用以補不足從之 監察御史劾宣撫使  
多爾濟巴勒學士李塔喇海劉紹祖庸鄙不勝任中書議  
三人皆勲舊子孫罪無實狀乞復其職仍勅憲臺勿以  
空言妄劾從之 丁卯岑世興及鎮安路岑修文合山  
獠角蠻六萬餘人為寇命湖廣雲南行省招諭之 遣  
指揮使鄂都瑪勒錫西番呪語于居庸關崖石 庚午奇  
珠招諭永明縣五洞徭來降 處士綽斯其先大食國  
人後家真定父韓齊爾始從儒先生問學輕財重義不

于仕進綽斯生九歲日記古經傳至于言比弱冠博極羣籍見諸踐履皆篤實之學故其年雖少已為鄉邦所推重延祐初詔以科舉取士有勸其就試者綽斯笑而不應既而侍御史郭思貞翰林學士承旨劉賡參知政事王士熙文章論薦之及是以遺逸徵至上都見帝於龍虎臺眷遇優渥時都爾蘇柄國西域人多附焉綽斯獨不往見都爾蘇屢使人招致之即以養親辭歸綽斯還於經而易學尤深至於天文地理鍾律算數水利旁

及外國之書皆究極之家貧饘粥或不繼考訂經傳常  
自樂也 六月癸酉朔以托海特穆爾為四川行省平  
章政事請終母喪從之 癸未播州蠻黎平愛復叛合  
謝烏窮為寇宣撫使楊伊埒布哈招平愛出降烏窮不  
附命湖廣行省討之 丁酉遣道士吳全節修醮事于  
龍虎三茅閣皂三山 戊戌遣使祀解州鹽池神 中  
書省臣言比郡縣旱蝗臣等不能調變故災異降戒今  
當恐懼徹省力行善政亦冀陛下敬慎修德憫恤生民

帝嘉納之 己亥納皇姊壽寧公主女薩都巴拉于中

宮 道州路標所源徃為寇命奇珠督兵捕之 大昌

屯河決 秋七月甲辰車駕發上都禁車騎踐民禾

造麤豹羶車三十兩 壬子皇后受雅滿達噶戒于水

精殿 甲寅辛大乾元寺敕鑄五方佛銅像 乙卯詔

翰林侍講學士阿魯威直學士雅奇譯世祖聖訓以備

經筵進講 戊午遣日本僧瑞興等四十人還國 作

別殿于潛邸 敕入粟拜官者准致仕銓格 乙丑發

兵修野狐色珍桑乾三嶺道 戊辰太白經天 河決

鄭州陽武縣漂民萬六千五百餘家賑之 大同渾源

河溢檀順等州兩河決溫榆水溢 八月甲戌額卜德呼

勒許師敬並以災變饑歉乞解政柄不允 甲申長春

宮道士藍道元以罪被黜詔道士有妻者悉給徭役

寧遠州洞蠻刁用為寇命雲南行省備之 辛卯雲南

行省丞相伊爾濟達廉訪副使沙卜珠丹以使酒相詆

狀聞詔兩釋之 辛丑帝次中都畋於翁果察圖之地

作天妃宮于海津鎮 詔諭廉州蠶戶使復業 鹽

官州大風海溢壞隄防三十餘里遣使祭海神不止徙  
居民千二百五十家 大都昌平大風壞民居九百家  
揚州崇明州大風雨海水溢溺死者給棺歛之 九

月辛亥命帝師還京修灑淨佛事于大明興聖隆福三  
宮 庚申帝還大都 癸亥中書省臣言今國用不給  
陛下當法世祖之勤儉以為永圖臣等在職苟有濫承  
恩賞者必當回奏帝嘉納之 汾州平遙縣汾水溢

冬十月辛未朔癸亥卒四千治通州道 辛巳天壽節遣

道士祠衛輝太一萬壽宮勅中書省遣官從行備供億

癸未河水溢汴梁路樂利堤壞役丁夫六萬四千人

築之 京師饑發粟八十萬石減價糴之 賜大天源

延聖寺鈔二萬錠吉安臨江二路田千頃中書省臣言

養給軍民必藉地利世祖建大宣文弘教等寺賜永業

當時已號虛費而成宗復構天壽萬寧寺較之世祖用

增培半若武宗之崇恩福元仁宗之承華普慶祖權所



入抑又甚焉英宗鑿山開寺損兵傷農而卒無益夫土地祖宗所有子孫當共惜之臣恐茲後藉為口實妄興工役徵福利以逞私欲惟陛下察之帝嘉納焉然不能用也十一月庚子陝西行臺中丞姚瑋請集世祖嘉言善行以時省覽從之宣撫使瑪哈穆特李讓劾浙西廉訪使譔勒哲布哈受賂簿對不服詔遣刑部郎中索珠鞫其侵辱使者答之癸卯中書省臣言西僧每假元辰疏釋重囚有乖政典請罷之詔自今當釋者令宗正

府審覆 己酉作鹿頂棕樓 戊午造中統至元鈔各  
十萬錠 封諸王特穆爾布哈為鎮南王鎮揚州 辛  
酉加封廬陵江神曰顯應 播州蠻宋王保來降 十  
二月己巳徙上都清寧殿于巴雅爾行宮 錦州水溢  
壞田千頃漂死者百人人給鈔一錠 崇明州海溢漂民  
舍五百家賑糧一月死者鈔二十貫 壬午監察御史  
賈瑄請祔武宗皇后于太廟不報 勅以來年元夕構  
燈山于內庭御史趙師魯以水旱請罷其事從之 丙

成以回回陰陽家言天變給鈔二千錠施有道行者及  
乞人繫囚以穰之 丁亥寧夏路地震有聲如雷連震  
者四 庚寅赦天下左丞相都爾蘇與平章政事額卜德呼  
勒以私意欲因赦酬累朝賈胡所獻諸物之直及擢用  
英廟至今為憲臺奪官者以詔稿示左司都事宋本本  
讀竟白曰今警災異而畏獻物未酬直者憤怨此有司  
細故形諸王言必貽笑天下司憲禠有罪者官世祖成  
憲也今上御位累詔法世祖今擢用之是廢成憲而反

汗前詔也後復有邪佞賊穢者將治之耶置不問邪執政聞本言相視歎息罷去明日宣詔竟本遂稱疾不出名浙江行省左丞趙簡為集賢大學士領經筵事

壬辰以皇子錫錫夜啼賜高年鈔 癸巳作鹿頂殿

己亥命帝師修佛事釋重囚三人 置大承華普慶寺

總管府 御史言比年營繕以衛軍供役廢武事不講

請遵世祖舊制教習五衛親軍以備扈從不報 是歲

亳州河溢漂民舍八百餘家壞田二千三百頃免其租

大寧路大水壞田五千五百頃漂民舍八百餘家溺死者人給鈔一錠

四年春正月乙巳御史臺臣請親祀郊廟先是監察御史趙師魯以大禮未舉言天子親祀郊廟所以通精誠逆福釐生烝民阜萬物百王不易之禮也宜講求故事對越以格純嘏至是臺臣復以為言帝曰朕遵世祖舊制其命大臣攝之庚戌監察御史辛鈞言西商鬻寶動以數十萬錠今水旱民貧請節其費不報壬子以

中政院金銀鐵冶歸中書 甲寅鷹師托克托病賜鈔千

錠 戊午命市珠寶首飾 庚申皇子允丹藏布受佛

戒于智泉寺 鹽官州海水溢壞捍海堤二千餘步

丁卯浚會通河築瀋州護倉堤役丁夫三萬人 二月

甲戌祭太祖太宗睿宗御容于大承華普慶寺以翰林

院官執事 乙亥親王額森特穆爾出鎮北邊 丙戌

詔同僉樞密院事雅克特穆爾教閱諸衛軍 戊子進襲

封衍聖公孔思晦階嘉議大夫時山東廉訪副使王鵬

南言思晦襲封上公而階止四品於格弗稱且失尊崇  
意故有是命思晦以宗祀責重恒懼弗勝每遇祭祀必  
敬必慎先是廟燬於兵後雖苟完而角樓圍牆未備思  
晦竭力營度以復其舊金絲堂壞又一新之祭器禮服  
悉加整飭又以尼山乃毓聖之地故有廟已毀民冒耕  
祭田且百年思晦復其田里請置尼山書院以列於學  
官朝廷從之三氏學舊有田三千畝占於豪民子思書  
院舊有營運錢萬緡貸於民取子錢以供祭祀久之民

不輸子錢并負其本思晦皆理而復之聖父舊封齊國  
公思晦言於朝曰宣聖封王而父爵猶公願加褒崇乃  
詔加封啓聖王聖母王夫人五季時孔末之後方盛欲  
以偽滅真害宣聖子孫幾盡至是其裔復欲冒稱宣聖  
後思晦以為不早辨則真偽久益不可明彼與我不共  
戴天乃列於族與共拜殿庭可乎遂會族人稽典故斥  
之既又重刻宗譜於石而孔氏族裔益明矣 辛卯白  
虹貫日 三月辛丑皇子允丹藏布出鎮北邊以諾海



齊為惠國公商議內史府事 癸卯和寧地震有聲如

雷 丙午廷試進士阿恰齊李黼等八十五人賜及第

出身有差黼賴人工部尚書守中之子守中性卞急遇

子極嚴每一飲酒輒半月醉不解黼百計承順求寧親

心終不可得跪而自訟往往達旦無幾微厭怠之意至

是以明經魁多士授翰林修撰 命西僧作止風佛事

潮州路判官錢珍挑推官梁楫妻劉氏不從誣楫下

獄殺之事覺珍飲藥死詔戮尸傳首海北廉訪副使劉

安仁坐受珍賂除名 庚申遣使往南求奇花異果

辛酉召翰林學士承旨張珪集賢大學士廉恂太子賓客王毅悉復舊職陝西行臺中丞敬儼為集賢大學士並商議中書省事珪仍預經筵事 壬戌帝如上都

渾河決發軍民萬人塞之 夏四月辛未盜入太廟竊武宗金主及祭器以典守宗廟不嚴罷太常禮儀院官壬申作武宗主太常博士李好文言在禮神主當以木為之金玉祭器宜貯之別室又言祖宗建國以來七八

十年每遇大禮皆臨時取具博士不過循故應答而已  
往年有招為集禮而乃令各省及各郡縣置局纂修宜  
其久不成也禮樂自朝廷出郡縣何有哉白長院者選  
僚屬數人乃請出架閣文牘以資採錄三年書成凡五  
十卷名曰太常集禮好文東明人登至治元年進士第  
甲戌作棕毛鹿頂樓 癸未鹽官州海水溢侵地十  
九里命都水少監張仲仁及行省官發工匠二萬餘人  
以竹落木柵實石塞之不止尋命天師張嗣成修醮禳

之 癸巳高州徭寇電白縣千戶張額力戰死之邑人  
立祠勅賜額曰旌義 甲午賜西僧袞噶伊實巴絅喇  
實嘉勒燦藏布巴勒玉印 乙未湖廣徭寇全州義寧  
屬縣命守將捕之 五月丁卯修佛事于賀蘭山及諸  
行宮 元江路總管普襲坐贓免遂結蠻兵作亂勅復  
其舊職未幾復叛 是月睢州河溢衛輝路大風九日  
木盡偃河南路洛陽縣有蝗可五畝羣食之既數日蝗  
再集又食之 六月辛未翰林侍講學士阿魯威直學

士雅奇等進講仍命譯資治通鑑以進 中書參知政  
事史惟良請解職歸養不允 辛巳造象輿六乘 甲  
申廣西花角蠻為寇命所部討之 乙未汴梁路河決

秋七月己亥御史臺臣言內郡江南旱蝗洊至非國  
細故丞相達實特穆爾都爾蘇參知政事布哈史惟良  
參議邁努並乞解職詔慰留之 修大明殿 建橫渠

書院于鄆縣祀宋儒張載 丁未敕經筵講讀官非有  
代不得去職 詔諭宗正府決獄遵世祖舊制 庚戌

遣翰林侍讀學士阿魯威還大都譯世祖聖訓 乙丑

周王和實拉及諸王揚珠濟達等來貢賜金銀鈔幣有

差 是月雲州黑水河溢 八月戊辰漳沱河水溢發

丁浚治河以殺其勢 奉元路治中單鵠言令民採捕

珍禽異獸不便請罷之勅應獵者其捕以進 乙亥苗

人祭伯秧寇李陀寨命湖廣行省捕之 庚辰運粟十

萬石貯瀕河倉備內郡饑 田州洞徭為寇遣湖廣行

省捕之 壬辰御史李昌言河南行省平章政事通通

世官河南大為姦利請徙他鎮不報 癸巳謚武宗皇

后曰宣慈惠聖英宗皇后曰莊靜懿聖升祔太廟 發

衛軍八千修白浮瓮山河堤 是月崇明州海門縣海

水溢扶溝蘭陽二縣河溢沒民田廬並賑之通渭縣山

崩碣門地震有聲如雷晝晦天全道山崩飛石斃人鳳

翔興元成都峽州江陵地同日皆震 九月丙申朔日

有食之阿恰齊德濟獻木棉大行帳 勅國子監仍

舊制歲貢生員業成者六人 禁僧道買民田違者坐

罪沒其直 壬寅寧夏路地震 甲子御史言廣海古

流放之地請以職官贓汙者處之以示懲戒從之 閏

月己巳太白經天帝至自上都 壬申以災變赦天下

廣西兩江徭為寇命所部捕之 甲戌命祀天地享

太廟致祭五嶽四瀆名山大川 冬十月癸卯命帝師

作佛事于大天源延聖寺 甲辰改封建德路烏龍路

烏龍山神曰忠顯靈澤普佑孚惠王 乙巳晝有流星

丁巳以御史中丞趙世延為中書右丞以中書參議



傅巖起為吏部尚書御史韓鏞言吏部掌天下銓衡巖起從吏入官烏足知天下賢才尚書三品秩巖起累官四品於法亦不得陞制可鏞濟南人登延和五年進士第壬戌開南州土官阿只弄率蠻兵為寇雲南行省招捕之大都路諸州縣霖雨水溢壞民田廬賑糧二十四萬九千石十一月陽曲縣地震十二月庚子發米三十萬石賑京師饑定捕盜令限內不獲者償其贓癸卯命中書右丞趙世延參議韓讓左司郎中

姚庸提調國子監 乙卯植萬歲山花木八百七十本  
前翰林學士承旨蔡國公張珪卒於家 是歲汴梁諸  
屬縣霖雨河決揚州路通州崇明州大風海溢 平樂  
梧州靜江諸徭並為寇湖廣行省督兵捕之 前江南  
行臺御史大夫喀喇托克托卒延祐末托克托為江西行省  
左丞相英宗嗣位召拜御史大夫時特齊先為大夫陰  
忌之後改江南行臺大夫復喉言者劾其擅離職守將  
徙之雲南會特齊伏誅乃解家居不出者五年及是卒

至正初追封和寧王謚忠獻托克托嘗即宣德別墅延師  
以訓子鄉人化之皆向學朝廷賜其精舍額曰景賢書  
院為設學官其沒也即其中祠焉 前翰林學士承旨  
耶律希亮卒希亮楚材之孫鑄之子也性至孝困厄遐  
方家貲散亡已盡僅藏祖考畫像四時就穹廬陳列致  
奠盡誠盡敬四方之人咸相聚來觀歎曰此謹祀之禮  
也雖疾病不廢書史卒年八十一追封漆水郡公謚忠  
嘉

資治通鑑後編卷一百六十八

欽定四庫全書

資治通鑑後編卷一百六十九

刑部尚書徐乾學撰

元紀十七

起著雍執徐正月盡屠維  
大荒落八月凡一年有奇

泰定帝

致和元年春正月甲戌命繪蠶麥圖 乙亥詔諭百司

凡不赴任及擅離職者奪其官避差遣者答之 監察

御史鄒惟亨言時享太廟三獻官舊皆勲戚大臣而近

以戶部尚書為亞獻人既疎遠禮難嚴肅請仍舊制以  
省臺樞密宿衛重臣為之 丁丑頒農桑舊制十四條  
於天下仍詔厲有司以察勤惰 帝將畋柳林己卯御  
史王獻等以歲饑諫帝曰其禁衛士毋擾民家命御史  
史二人巡察之 禁僧道匿商稅 辛己靜江徭寇靈  
川臨桂二縣命廣西招捕之 戊子罷河南鐵冶提舉  
司歸有司 加封幸淵龍神福應昭惠公 二月庚申  
詔天下改元致和免河南自實田糧一年被災州郡稅

糧一年流民復業差稅三年疑獄繫三歲不決者咸釋之 癸亥解州鹽池黑龍堤壞調番休鹽丁修之 三

月庚午雲南安隆寨土官岑世忠與其兄世興相攻籍其民三萬二千戶來附歲輸布三千匹請立宣撫司以總之不允置州一以世興知州事置縣二聽世忠舉人用之仍諭其兄弟共處 達實特穆爾都爾蘇言災異未弭由官吏以罪黜罷者怨誹所致請量才叙用從之 辛未大天源延聖寺顯宗神御殿成置總管府以司財

賦 己卯帝御興聖殿受無量佛戒于帝師庚辰命僧  
千人修佛事于鎮國寺 甲申遣戶部尚書李嘉努往  
鹽官祀海神仍集議修海岸丙戌詔帝師命僧修佛事  
于鹽官州仍造浮屠二百一十六以厭海溢 帝畋于  
柳林以疾還宮時僉書樞密院事雅克特穆爾兼總環衛  
自以身受武宗寵拔之恩其子宜纂大位而一居朔漠  
一處南陲實天之所置將有以啓之至是都爾蘇狡悞  
自用災異數見人心不附咸有變志諸王們都阿穆爾



台太常禮儀使教罕宗正扎爾古齊庫庫楚等與雅克特  
穆爾謀曰今主上之疾日臻將往上都如有不諱吾黨  
扈從者執諸王大臣殺之居大都者即縛大都省臺官  
宣言太子已至正位宸極傳檄守禦諸關則大事濟矣  
戊子帝如上都們都庫庫楚等扈從西安王喇特納  
實哩居守雅克特穆爾亦留京師夏四月丙申欽州徭  
黃焱等為寇命湖廣行省備之己亥達實特穆爾都  
爾蘇請凡蒙古色目人效漢法丁憂者除其名從之

己酉御史楊倬等以民饑請分僧道儲粟濟之不報

甲寅改封蒙山神曰嘉惠昭應王鹽池神曰靈富公洞庭廟神曰忠惠順利靈濟昭佑王唐柳州刺史柳宗元曰文惠昭靈公 戊午禁偽造金銀器皿 是月崇明

州大風海溢 五月甲子遣官分護流民還鄉仍禁聚

至千人者杖一百 丙寅廣西普寧縣僧陳慶安作亂

僭號改元 癸酉籍在京流民廢疾者給糧遣還 大

理怒江甸土官阿哀你寇樂辰諸寨命雲南行省督兵

捕之 庚辰有流星大如缶其光燭地 秋七月辛酉朔寧夏地震 庚午帝崩于上都年三十六葬起輦谷王禕曰武宗以兄弟相及約繼世子孫迭居大位而仁宗惑於儉言不守宿諾傳位英宗仍使武宗二子明宗文宗出居于外及英宗遇弑而明宗在北文宗在南晉邸乘間入繼大統或謂晉邸非所宜立雖然晉王於世祖孫也於次為長雖守藩服嘗有盟書今而國統之弗繼則求所當立者舍晉王之系將誰屬

耶然則謂晉邸非所宜立者亦過也舊傳英宗之弑  
晉邸與聞故于其沒不舉請謚之祔之典明其為賊  
也然考之實錄皆不得其實傳聞之謬烏可信哉

己卯大寧路地震都爾蘇及梁王旺沁遼王托克托結  
黨害政踰月不立君朝野疑懼雅克特穆爾謀於西安王  
喇特納實哩陰結勇士以圖舉義八月甲午黎明百  
官集興聖宮雅克特穆爾率阿爾婁特穆爾博囉齊等一十  
七人兵皆露刃號於衆曰武宗皇帝有聖子二人孝友

仁文天下歸心大統所在當迎立之敢有不順者斬乃  
手縛平章政事額卜德呼勒巴延徹爾分命勇士執中書  
左丞托多參政王士熙參議托克托吳秉道侍御史特穆  
爾立世傑太子詹事丞王桓等皆下獄雅克特穆爾與西  
安王入守內庭分處腹心于樞密自東華門夾道重列  
軍士使人傳命往來其中以防漏泄於是籍府庫錄符  
印召百官入內聽命時周王和實拉方遠在沙漠猝未  
能至慮生他變乃遣前河南行省參政明埒克棟阿前宣

政使達爾瑪實哩馳驛迎懷王圖卜特穆爾于江陵密以  
意諭河南行省平章政事巴延令簡兵以備扈從是日  
推前湖廣行省左丞相拜布哈為中書左丞相太子詹  
事達實哈雅為中書平章政事前湖廣行省右丞蘇蘇  
為中書左丞前陝西行省參知政事王布琳濟達為樞  
密副使與中書右丞趙世延翰林學士承旨伊拉齊通  
政院使哈沙分典機務調兵守禦關要徵諸衛兵屯京  
師下郡縣造兵器出府庫犒軍士時有諸衛軍無統屬

者又有謁選及罷退軍官皆給之符牌以待調遣既受命未知所謝注目而立乃指使南向拜衆皆愕然始知有定向矣雅克特穆爾直宿禁中達旦不寐一夕或再徙人莫知其處弟薩敦子騰吉斯時留上都密遣達實特穆爾召之皆棄其妻子來歸 乙未調諸衛兵守居庸關及盧兒嶺 丙申遣左衛率使圖魯將兵屯白馬甸隆鎮衛指揮使阿都瑪勒將兵屯泰和嶺 丁酉發中衛兵守遷民鎮又遣薩里布哈等往江陵趣懷王早發且

令達實特穆爾矯為使者自南來言懷王已次近郊使民無驚疑 戊戌徵宣靖王邁努諸王雅克布哈于山東已亥徵兵遼陽明埒克棟阿等至汴梁以其謀密告巴延巴延歎曰此吾君之子也吾夙荷武皇厚恩委以心膂今爵位至此非覬萬一為己富貴計大義所臨曷敢顧望即集僚屬明告以故於是會計倉廩府庫穀粟金帛之數乘輿供御牢餼膳羞徒旅委積士馬芻糧供億之需以及賞賚犒勞之用靡不備至不足則檄州縣



募民折輸明年田租及貸商人貸貲約倍息以償又不  
足則邀東南常賦之經河南者輒止之以給其費徵發  
民丁增置驛馬補城槽浚濠池修戰守之具嚴徵邏斥  
堠日被堅執銳與僚佐曹掾籌其便宜即遣蒙古布哈  
以其事馳告懷王又使羅璽報雅克特穆爾曰公盡力京  
師河南事我當自效巴延別募勇士五千人以迎懷王  
而躬勒兵以俟參政托里台曰今蒙古軍馬與宿衛之  
士皆在上都而令塔瑪齊軍守諸隘吾恐此事之不可

成也我等圖保性命他何計哉巴延不從其言是夜托里台懷刃欲殺巴延為變巴延覺遂拔劍殺之奪其所部軍器收馬千二百匹懷王命薩里布哈拜巴延河南行省左丞相 庚子癸宗仁衛兵增戶遷民鎮 辛丑遣萬戶薩里特穆爾將兵屯河中 癸卯河南行省殺平章庫梭右丞巴延特穆爾是日明埒克棟阿等至江陵甲辰懷王發江陵遣使召鎮南王特穆爾布哈威順王庫春布哈湖廣行省平章特穆爾布哈來會執湖廣行

省左丞瑪哈穆特送京師以布色代之 丙午遣前西臺  
御史喇嘛凱巴諭陝西 丁未命薩敦以兵守居庸關  
騰吉斯屯古北口 戊申復令奈瑪台為北使稱周王  
從諸王兵整駕南轅中外乃安 己酉上都諸王們都  
阿穆爾岱宗正扎古爾齊庫庫楚前河南行省平章政  
事瑪魯集賢侍讀學士烏魯斯布哈太常禮儀院使噶  
海齊等十八人同謀授大都事覺都爾蘇殺之 庚戌  
懷王至汴梁前翰林學士承旨鄂博哈雅以父憂家居

聞王之入即易服南迎至汴郊見焉王命為河南行省  
平章政事已延屬橐鍵探甲冑與百官父老導入咸俯  
伏稱萬歲即叩頭勸進王解金鎧寶刀及海東白鶻文  
豹賜已延明日扈從北行鄂博哈雅鎮汴高價糴粟以  
峙糧儲命近郡分治戎器閱士卒括馬民間以備不虞  
辛亥薩里布哈至自江陵云懷王已啓塗是日拜雅  
克特穆爾知樞密院事壬子阿蘇衛指揮使托克特穆爾  
帥其軍自上都來歸即命守古北口癸丑上都諸王

及用事臣以兵分道犯京畿留遼王托克托諸王博囉特  
穆爾太師托迪左丞相都爾蘇知樞密院事特穆爾圖  
居守 甲寅喇嘛凱巴等至陝西皆見殺 乙卯托克托  
特穆爾及上都諸王實剌平章政事奈瑪台詹事奇徹戰  
于宜興斬奇徹於陣擒奈瑪台送京師殺之實剌敗走  
丙辰雅克特穆爾率百官備法駕郊迎丁巳懷王至京  
師入居大內桂齊衛指揮使托蘇自上都率其軍來  
歸命守古北口 戊午懷王以蘇蘇為中書平章政事

前御史中丞曹立為中書右丞江浙行省參知政事張  
友諒為中書參知政事河南行省左丞相巴延為御史  
大夫中書左丞趙世延為御史中丞 己未以河南萬  
戶伊蘇岱爾同知樞密院事 上都梁王旺沁右丞相  
達實特穆爾太尉布哈平章政事瑪魯御史大夫寧珠  
等兵次榆林 隆鎮衛指揮使黑漢謀附上都坐棄市  
籍其家 九月庚申朔雅克特穆爾督師居庸關遣薩敦  
襲上都兵于榆林擊敗之追至懷來而還 隆鎮衛指

揮使阿都瑪勒以兵襲上都諸王穆爾特穆爾特默齊於  
陀羅臺執之歸于京師時都爾蘇在上都立皇太子阿  
勒濟雅巴為皇帝時方九歲改元天順 命有司括馬

中書左丞相拜布哈言回回人哈勒哈台自至治間貸官  
鈔違制別往番邦得寶貨無算法當沒官而都爾蘇私  
其種人不許今請籍其家從之 雅克特穆爾請釋瑪哈

穆特從之陝西兵入河中府劫行用庫鈔萬八千錠殺  
同知府事布琳圖 壬戌命蘇蘇宣諭中外曰昔在世

祖以及列聖臨御咸命中書省綱維百司總裁庶政凡  
錢穀銓選刑罰興造罔不司之自今除樞密院御史臺  
其餘諸司及左右近侍敢有隔越中書奏請政務者以  
違制論監察御史其糾言之 以高昌王特穆爾布哈  
知樞密院事額森努爾為宣徽院使 徵五衛屯田兵赴  
京師 賜上都將士來歸者鈔各有差 樞密院臣言  
河南行省軍列戍淮西距潼關河中不遠湖廣行省軍  
唯平陽保定兩萬戶號稱精銳請發蘄黃戍軍一萬人



及兩萬戶軍為三萬命湖廣參政鄭昂霄萬戶托克特  
穆爾將之並黃河為營以便徵遣從之 名雅克特穆爾赴  
闕 上都諸王額森特穆爾遼東平章圖們岱爾以兵  
入遷民鎮遣薩敦往拒至薊州東流沙河累戰敗之

丁卯雅克特穆爾率諸王大臣伏闕請早正大位以安天  
下懷王固辭曰大兄在朔漠予敢紊天序乎雅克特穆爾  
曰人心向背之機間不容髮一或失之噬臍無及懷王  
曰必不得已當明著吾意以示天下而後可 遣元帥

教拉往守居庸關 上都軍攻碑樓口指揮使伊蘇岱

爾禦之不克 戊辰以大司農明埒克棟阿大都留守庫

庫台並為中書平章政事台募勇士從軍遣使分行河

間保定真定及河南等路括民馬徵鄆陵縣河西軍赴

闕 命襄陽萬戶楊克忠鄧州萬戶孫節以兵守武關

己巳鑄御寶成 立行樞密院于汴梁以同知樞密

院事伊蘇岱爾知行樞密院事將兵行視太行諸關西

擊河中潼關軍以摺疊弩分給守關軍士 辛未常服

謁太廟 是日額卜德呼勒特默格素布托多王士熙巴  
延徹爾托歡等各流于遠州並籍其家 壬申懷王即  
皇帝位于大明殿受諸王百官朝賀大赦詔曰我世祖  
皇帝混一海宇爰立定制以一統緒宗親各受分地勿  
敢妄生覬覦此不易之成規萬世所共守者也世祖之  
後成宗武宗仁宗英宗以公天下之心以次相傳宗王  
貴戚咸遵祖訓至於晉邸具有盟書願守藩服而與賊  
臣特克實額森特穆爾等潛通陰謀冒干寶位使英宗不

幸罹於大故朕兄弟播越南北徧歷艱險臨御之事豈復與聞朕以叔父之故順承惟謹於今六年災異迭見權臣都爾蘇額卜德呼勒專權自用踈遠勲舊廢棄忠良變亂祖宗法度空府庫以私其黨類大行上賓利於立幼顯握國柄用成其奸宗王大臣以宗社之重統緒之正協謀推戴屬於眇躬朕以非德宜俟大兄固讓再三宗室將相百僚耆老以為神器不可以久虛天下不可以無主周王遼隔沙漠民庶皇皇已及三月誠懇迫切

朕姑從其請謹俟大兄之至以遂朕固讓之心已於致和元年九月十三日即皇帝位于大明殿其以致和元年為天歷元年可大赦天下 癸酉封雅克特穆爾為太平王以太平路為食邑賜平江官田五百頃加開府儀同三司上柱國錄軍國重事中書右丞相監修國史時遼東圖們岱爾兵至薊州即日命雅克特穆爾將兵擊之乙亥次三河而旺沁等軍已破居庸關遂進屯三塚丙子雅克特穆爾蓐食倍道而還丁丑抵榆河關帝出齊化

門視師將親督戰雅克特穆爾單騎請見曰陛下出民心必驚凡翦寇事一以責臣願陛下亟還宮以安黎庶帝乃還先是徵左右阿蘓衛軍老幼赴京師不行者斬籍其家阿蘓衛指揮使呼圖克巴爾達噶特穆爾等於是構變事覺械送京師斬以徇濠州民朱世珍生子於鍾離縣之東鄉名曰元璋是為明太祖朱氏世居沛國相縣其後徙家句容又渡淮居泗州至世珍乃遷于鍾離有四子元璋其季也戊寅諭中外曰近以姦臣都

爾蘇額卜德呼勒潛通陰謀變易祖宗成憲既已明正其罪凡回回種人不預其事者其安業勿懼有因而煽惑其人者罪之 命高昌僧作佛事于延春閣 命留守

司完京城軍士乘城守禦

雅克特穆爾與旺沁前軍遇

于榆河北我師奮擊敗之追至紅橋北旺沁將樞密副使阿拉克特穆爾指揮呼圖克特穆爾引兵會戰阿拉克特穆爾執戈入刺雅克特穆爾側身以刀格其戈就斫之中其左臂部將華善馳擊呼圖克特穆爾亦中其左臂二人驍

將也敵為奪氣遂卻因據紅橋兩軍阻水而陣命善射者射之遂退師于白浮南命知院伊蘇岱爾巴圖爾伊納克實分為三隊張兩翼以角之敵軍敗走 庚辰詔

諭御史臺今後監察御史廉訪司凡有刺舉並著其罪無則勿妄以言廉訪司書吏當以職官教授吏員鄉貢進士參用 加封漢將軍關公為顯靈義勇武安英濟王遣使祀其廟 辛巳我師與上都軍大戰于白浮之野雅克特穆爾手斃七人會日晡對壘而宿夜二鼓遣阿



拉克特穆爾將精銳百騎鼓譟射其營敵衆驚擾互自相擊至旦始悟人馬死傷無數明日天大霧獲敵卒二人云旺沁等脫身竄山谷矣 癸未旺沁集散卒成列出山我師駐白浮西堅壁不動是夜又命薩敦潛軍繞其後部曲巴圖爾壓其前夾營吹銅角以震盪之敵不悟而亂自相撾擊三鼓後乃西遁遲明追及于昌平北斬首數千級降者萬餘人帝遣使賜雅克特穆爾上尊諭旨曰丞相每臨陣躬冒矢石脫有不虞奈何自今第以

大將旗鼓凭高督戰可也雅克特穆爾對曰凡戰臣必以身先之敢後者論以軍法若委之諸將萬一失利悔將何及是日敵軍再戰再北旺沁單騎亡命薩敦追之不及還至昌平南俄報古北口不守上都軍掠石槽乃遣薩敦為先驅雅克特穆爾以大軍繼其後至石槽敵軍方炊掩其不備直蹂之大軍并進追擊四十里至牛欄山擒駙馬博囉特穆爾等獻俘闕下戮之各衛將士降者不可勝計餘兵奔竄夜遣薩敦襲之逐出古北口清

安王庫庫布哈等將陝西兵潛由潼關南水門入萬戶博  
囉棄走庫庫布哈等分據陝州諸縣縱兵四劫迤邐前  
進河南告急之使狎至 乙酉追封乳母旺扎勒雲國夫  
人其夫烏魯斯贈太保封雲國公謚忠懿子索諾蒙贈司  
徒封雲國公謚貞閔 丁亥圖們岱爾及諸王伊蘇特  
穆爾軍陷通州將襲京師雅克特穆爾急引軍還令京城  
里長召募丁壯及百工合萬人與兵士為伍東城守禦  
命居庸關及冀寧保德靈石代崞嵐石汾隰吉州諸關

皆穿塹壘石以固調丁壯守之 戊子陝西行臺御史大夫額森特穆爾引兵從大慶關渡河擒河中府官殺之萬戶薩里特穆爾軍潰而遁官吏皆棄城走額森特穆爾悉以其黨代之 有使持詔自江浙還言行省臣意若有不服者命遣使問不敬狀將悉誅之中書左司郎中策丹言於丞相雅克特穆爾曰皇帝新即位雲南四川且猶未定乃以使臣一言殺行省大臣恐非盛德事況江浙豪奢之地使臣或不得厭其所需則造言以陷

之耳雅克特穆爾以言於帝事乃止 冬十月己丑朔日  
將昏雅克特穆爾抵通州乘圖們岱爾等初至擊之敵軍  
狼狽走渡潞河庚寅夾河而軍敵列植黍稽衣以氊衣  
然火為疑兵夜遁辛卯我師渡河追之 上都諸王呼

喇台等兵入紫荊關將士皆潰遣托克托穆爾等將兵四  
千援之紫荊關敗卒南走保定因肆剽掠同知路事阿  
哩沙及故蔡國公張珪子武昌萬戶景武等率民持挺  
擊死數百人壬辰額森努爾軍至保定殺阿哩沙及張景

武兄弟五人并取其家貲 癸巳雅克特穆爾及陽翟王  
太平國王多囉台等戰于檀子山之棗林騰吉斯陷陣  
殺太平死者蔽野餘皆宵遁遣薩敦追之不及而還

呼喇台等兵自紫荆關進逼涿州至良鄉游騎犯南城  
甲午托克托穆爾章吉特與額森努爾合兵擊之轉戰至盧溝  
橋呼喇台被創據橋而宿乙未雅克特穆爾率諸將循北  
山而西令脫卸繫囊盛莖豆以飼馬士行且食晨夜兼  
程至于盧溝河呼喇台聞之望風西走是日凱旋入自

肅清門帝大悅丙申賜宴興聖殿盡歡而罷 丁酉以  
縉山縣民十人嘗為旺沁向導誅其為首者四人餘各  
杖一百七籍其家貲妻子分賜守關軍士 戊戌諸將  
追阿拉克特穆爾等至紫荆關獲之送京師皆棄市 己  
亥圖們岱爾軍復入古北口雅克特穆爾遂以師赴之戰  
于檀州南野敗之東路蒙古萬戶哈喇諾海率麾下萬  
人降餘兵皆潰圖們岱爾走還遼東 使者頒詔于甘  
肅至陝西行省行臺官塗毀詔書械使者送上都湘寧

王巴拉實哩引兵入冀寧殺掠吏民時太行諸關守備  
皆缺冀寧路來告急勅萬戶華善將兵由故關援之冀  
寧路官募民兵迎敵華善以師為殿殺獲甚衆會上都  
兵大至華善退保故關冀寧遂陷 初齊王伊嚕特穆  
爾東路蒙古元帥布哈特穆爾聞帝即位乃趣上都圍  
之上都屢敗勢蹙辛丑都爾蘇奉皇帝寶出降梁王旺  
沁遁遼王托托為齊王所殺遂收上都諸王符印天順  
帝阿勒濟雅巴不知所終



丘濬曰泰定帝乃裕宗之嫡孫噶瑪拉之長子於屬  
為宗子非不當立也英宗為特克實所弑諸王迎立之  
初不與其謀武宗二子次雖當立然既為英宗所據  
則非其所有矣泰定初立之年即立阿剌濟雅巴為太  
子至是五年名分已定圖卜特穆爾遣兵攻之以致於  
死他史不明言其所以致死之由然所以致之死地  
者圖卜特穆爾也律以春秋書趙盾之法非弑而何

壬寅以宣徽使額森努爾知行樞密院事宜徽副使章吉特

為行樞密院副使與知樞密院事伊蘇岱爾等將兵西  
擊潼關軍以張珪女歸額森努爾癸卯額森特穆爾軍  
至晉寧本路官皆遁 甲辰晉邸及遼王所轄路府州  
縣達嚕噶齊並罷免禁錮選流官代之 丙午中書省  
臣言凡有罪者既籍其家貲又沒其妻子非古者罪人  
不孥之意今後請勿沒人妻子制可 丁未告祭于南  
郊 陝西兵至鞏縣黑石渡遂據虎牢我師皆潰儲仗  
悉為所獲河南行省來告急戒有司修城壁嚴守衛

己酉陝西兵奪武關萬戶楊克忠等兵潰 庚戌帝御  
興聖殿齊王伊魯特穆爾及諸王大臣奉上皇帝寶都  
爾蘇等從之京師下之獄分遣使者檄行省內郡罷兵  
以安百姓 壬子以河南江西湖廣入貢鴛鴦太頻令  
減其數以省驛傳 癸丑雅克特穆爾辭知樞密院事命  
其叔父蒙古東路元帥布哈特穆爾代之 御史臺臣  
言近北兵奪紫荆關官軍潰走掠保定之民本路官與  
故平章張珪子景武等五人率其民擊官軍死顏森努爾

不俟奏聞輒擅殺官吏及珪五子珪父祖三世為國勲臣設使珪子有罪珪之妻女又何罪焉今既籍其家又以其女歸額森努爾誠非國家待遇勲臣之意帝曰卿等言是命中書革正之 甲寅罷徽政院改立儲慶使司

湘寧王巴拉寶哩自冀寧還次馬邑元帥伊蘇岱爾執送京師其所俘男女悉還其家 丁巳毀顯宗室升

順宗祔右穆第二室成宗祔右穆第三室武宗祔左昭第三室仁宗祔左昭第四室英宗祔右穆第四室 加

命雅克特穆爾為達爾罕仍命子孫世襲其號 戊午詔  
諭廷臣曰凡今臣僚唯丞相雅克特穆爾大夫巴延許兼  
三職署事餘者並從簡省百司事當奏者共議以聞或  
私任己意者不許獨請上都官吏自八月二十一日以  
後擢用者並追收其制敕天下僧道有妻者皆令為民  
盜殺太尉布哈初布哈乘國家多事率眾剽掠居庸  
以北皆為所擾至是盜入其家殺之興和路當盜以死  
罪刑部議以為布哈不道眾所聞知幸遇盜殺而本路

隱其殘剝之罪獨以盜聞於法不當中書以聞帝嘉其議是月河南行省平章阿爾哈雅集省憲官問禦西兵之長策無有言者阿爾哈雅曰汴在南北之交使西人得至此則江南三省之道不通於畿甸軍旅應接何日息乎夫事有緩急輕重今重莫如足兵急莫如足食吾徵湖廣之平陽保定兩翼軍與吾省之鄧新翼廬州沂鄭炮弩手諸軍以備虎牢裕州哈喇婁鄧州孫萬戶兩軍以備武關荆子口以屬郡之兵及蒙古兩都萬戶

左右兩衛諸部丁壯之可入軍者給馬乘資裝立行伍  
以次備諸隘芍陂等屯田本自襄鄧諸軍來田者還其  
軍益以民之丁壯使守襄陽白土峽州諸隘別遣達海  
以備自蜀至者括汴汝荆襄兩淮之馬以給之府庫不  
足則命郡縣假諸殷富之家安豐等郡之粟溯黃河運  
至于陝糴諸汴汝近郡者則運諸滎陽以達于虎牢吾  
與諸軍各奮忠義以從王事宜無不濟者衆曰唯命即  
日部分行事出廉訪使董守中僉事沙克善在南陽右丞

托克托穆爾廉訪使布延在虎牢分遣兵馬以聽其調用  
餽餉之行千車相望阿爾哈雅親閱實之信以期會自  
虎牢之南至于襄漢無不畢給時朝廷置行樞密院以  
總西事襄漢荆湖河南郡縣皆缺官阿爾哈雅便宜擇  
材以處之朝廷皆從其請已而西兵逼河南行院使來  
報曰西人北行者度河中以趨懷孟磁南行者特默格  
過武關掠鄧州而殘之直趨襄陽攻破郡邑三十餘所  
過殺官吏焚廬舍且西結囊嘉特以蜀兵至矣阿爾哈



雅聞之益督餉西行遣行院官達海領兵攻特默格而  
又設備江黃置鐵繩于峽口作舟艦以待戰十九日與  
西兵遇于鞏縣之石渡轉戰及暮兩軍殺傷與墮澗谷  
死者相等而虎牢遂為敵有兵儲巨萬一旦悉亡焉諸  
軍歛兵而退二十二日至汴民大恐阿爾哈雅前後遣  
使告於朝輒為額森努爾所留不得朝廷音問兩浹旬矣  
阿爾哈雅亦憂之親出拊循其民修城闕以備衝突戒  
卒伍以嚴守衛雖甚危急而聲色不動恬然如平時衆

賴以安 十一月庚申用江南行臺御史王琚仁言汰  
近歲白身入官者 勅行臺凡有糾劾必由御史臺陳  
奏勿徑以封事聞 辛酉額森努爾兵至武安額森特穆爾  
即以軍降河東州縣聞之盡殺其所署官吏 癸亥帝  
宿齋宮甲子服袞冕享于太廟 是日西兵逼汴城將  
百里而近阿爾哈雅召行院憲司諸將吏告之曰吾荷  
國厚恩唯有一死以報上行院之出唯敵是圖而退保  
吾城不亦怯乎然敵亦烏合之衆何所受命而敢犯我

誠使知聖天子之命則衆沮而散爾吾今遣使告于朝  
請降詔赦其脅從註誤而整軍西嚮以臨之別遣精騎  
數千上龍門繞出其後使之進無所投退無所歸成擒  
於鞏洛之間必矣衆皆曰善即日與行院出師會使者  
自大都還言齊王已克上都奉寶璽來歸刻日至京矣  
阿爾哈雅乃置酒相賀發書告屬郡及江南三省又募  
士得拉珠者齎書諭之朝廷亦遣都護伊魯特穆爾奉  
詔放散西軍之在虎牢者西人於是駭悟且聞行省院

以兵至猶豫不敢進朝廷又使參政馮布哈親諭之乃  
信服靖安王遣使四輩與拉珠來請命逡巡而去阿爾  
哈雅乃解嚴報捷歛餘財以還民從陝西求民之被俘  
掠者歸其家凡數千人陝西官吏被獲者亦皆遣還朝  
廷遷阿爾哈雅為陝西行臺御史大夫以綏定之 庚  
午命總宿衛官分簡所募勇士非舊嘗宿衛者皆罷去  
日本國商舶至福建博易者江浙行省選廉吏征其  
稅 中書省臣言今歲既罷印鈔本來歲擬印至元鈔

一百一十九萬二千錠中統鈔四萬錠監察御史言戶部鈔法歲會其數易故以新期於流通不出其數邇者都爾蘇以上都經費不足命有司刻板印鈔今事已定宜急收毀從之 監察御史薩里布哈索諾木于欽張士弘言朝廷政務賞罰為先功罪既明天下斯定國家近年自特們德爾竊位擅權假刑賞以遂其私綱紀始紊迨至泰定爵賞益濫比以兵興用人甚急然而賞罰不可不嚴夫功之高下過之重輕皆係天下之公論願

命有司務合輿情明示黜陟功罪既明賞罰攸當則朝廷肅清紀綱振舉而天下治矣帝嘉納之 辛未特默格兵入襄陽本路官皆遁襄陽縣尹谷廷珪主簿張德獨不去西軍執之使降不屈死之時僉樞密院事達海擁兵南陽不救 壬寅雅兒特穆爾言向者上都舉兵諸王寶喇樞密同知阿齊拉等十人南望宮闕鼓譟其黨拒命逆戰情不可恕詔各杖一百七流遠州籍其家貲甲戌居泰定后鴻吉哩氏于東安州 丙子蘇蘇坐

受賂杖一百七徙襄陽以母年老詔留之京師 丁丑  
以躬祀太廟禮成御大明殿受諸王百官朝賀 荆王  
伊蘇額布根遣使傳檄至襄陽特默格引兵走 己卯  
中書省臣言內外流官年及致仕者並依階叙授以制  
勅今後不須奏聞從之 諸衛漢軍及州縣丁壯盱給  
甲冑兵仗皆令還官 庚辰遣使奉迎皇兄周王和寶  
拉于漠北 以中政院使敬儼為中書平章政事 壬  
午第三皇子寶寧更名太平訥命大司農敏珠爾巴養於

其家 詔行樞密院罷兵還 癸未上都左丞相都爾  
蘇伏誅磔其尸于市梁王旺沁亦賜死茂穆蘇寧珠薩  
題勒密實額森特穆爾等皆棄市時朝議欲盡戮朝臣之  
在上都者平章敬儼抗論謂是皆循例從行殺之非罪  
衆賴以獲免 甲申命威順王庫春布哈還鎮湖廣先  
是帝嘗命王征八番而蜀省囊嘉特拒命未平南臺御  
史秦起宗言武昌重鎮當備上流之師親王不可遠去  
力止之及王入見帝謂曰八番之行非秦元卿幾為失



計遂遣王還鎮朝議以起宗治蜀幕府忘其名以其字  
稱之曰秦元卿帝引筆改曰起宗其眷注如此未幾拜  
中臺御史起宗廣平深水人也 御史中丞趙世延以  
老疾辭職不許用故中丞崔或故事加平章政事居前  
職 丙戌以阿勒呼木特穆爾等六人在上都欲舉義不  
克而死並賜贈謚卹其家 勅趙世延及翰林直學士  
虞集製御史臺碑文 遣諸衛兵各還鎮 遼王托克托  
之子巴圖聚黨出剽掠勅宣德府官捕之 四川行省

平章囊嘉特自稱鎮西王以其省左丞托克托為平章前  
雲南廉訪使楊靜為左丞殺其省平章庫春等稱兵燒  
絕棧道烏蒙路教授杜巖肖謂聖明繼統方內大寧省  
臣當罷兵入朝庶免一方大害囊嘉特以其妄言惑眾  
杖一百七禁錮之 十二月庚寅命通政院整飭蒙古  
驛諸關隘嘗毀民屋以塞者賜民鈔俾完之 丙午謁  
武宗神御殿 御史臺言額森努爾將兵所至擅殺官吏  
俘掠子女貨財詔刑部鞠之籍其家杖一百七貳于南

寧命其妻歸父母家 庚子赦天下 中書省言陝西

行省行臺焚棄詔書坐罪當流雖經赦宥永不錄用為

宜制可 辛丑江南行臺御史言遼王托克托自其祖父

以來屢為叛逆蓋因所封地大物眾宜削王號處其子

孫遠方而析其元封分地詔中書與勲舊議其事 甲

寅復遣使薩題等奉迎皇兄于漠北 丁巳封西安王

喇特納實哩為豫王 戊午詔蒙古色目人願丁父

母憂者聽如舊制 是月加謚顏真卿正烈文忠公命

有司歲時致祭 陝西自泰定二年至是歲不雨大饑  
民相食 朔漠諸王皆勸周王南還王遂發諸王察克  
台沿邊元帥多埒克萬戶瑪魯等咸帥師扈行舊臣博  
囉尚嘉努哈巴爾圖皆從至金山嶺北行省平章政事  
拜丕勒迎武寧王齊齊克圖僉樞密院事特穆爾布哈繼  
至乃命博囉如京師兩都之民間王使者至懽呼鼓舞  
曰吾天子實自北來矣諸王舊臣爭先迎謁所至成聚  
是歲兩都構兵漕舟後至直沽者不果輸復漕而南

還行省欲坐罪督運者海道都漕運萬戶王克敬曰若  
常年而往返如是誠為可罪今蹈萬死完所漕而還豈  
得已哉乃請令其計石數附次年所漕舟達京師省臣  
從之 雅克布哈議封巴延王爵衆論附之參議中書  
省事策丹獨不言雅克特穆爾問故策丹曰巴延已為太  
保位列三公而復加王封後再有大功將何以處之且  
丞相封王出自上意今欲加太保王封丞相宜請於上  
王爵非中書選法也遂罷其議

明宗翼獻景孝皇帝

諱和實拉武宗長子也母曰仁獻章聖皇后伊奇哩氏帝

以大德四年十一月壬子生十一年武宗入繼大統立仁宗為皇太子命以次傳於帝武宗崩仁宗立延祐三年春立英宗為皇太子封帝為周王出鎮雲南行至陝西從臣不欲南行擁帝至金山之北遂居焉

天歷二年春正月己未朔立都督府以總左右欽察及龍翊衛命雅克特穆爾兼統之 庚申遣前翰林學士承

旨布達實哩北還周王行在所仍命太府大監實喇卜奉金幣以往 辛酉以高昌王特穆爾布哈為中書左

丞相大司農王毅為平章政事 周王遣哈喇哈達孫  
拉拉至京師以拜特穆爾扈從有功遣使以幣帛百匹  
即行在賜之 武寧王齊齊克圖遣使來言周王啓行之  
期 癸亥以雅克特穆爾為御史大夫初雅克特穆爾乞解  
相印還宿衛帝勉之曰卿已為省院惟未入臺其聽後  
命至是遷御史大夫依前錄軍國重事達爾罕太平王  
甲子齊王伊魯特穆爾薨 乙丑命中書左丞伊埒  
特穆爾迎周王 丙寅帝幸大承恩福元寺 戊辰遣

使獻海東鵲于周王行在所 辛未中書省臣言近籍  
沒竒徹家其子年十六請令與其母同居仍請繼今臣  
僚有罪致籍沒者其妻其子他人不得陳乞沒為官口  
從之 壬申遣近侍桑節巴勒以詔往四川往諭囊嘉特  
癸酉以遼陽省高麗肇州三萬戶將校從逆舉兵犯  
京畿拘其符印制勅 囊嘉特乞師于鎮西武靖王吹  
巴勒吹巴勒以兵守關隘 甲戌復命太僕卿嘉琿獻  
海東鵲于周王行在所 丙子皇后媵臣張珠通等七



人授集賢學士等官

丁丑囊嘉特攻破播州猫兒埡

監宣慰使楊伊埒布哈開關納之陝西蒙古軍都元帥  
布哈台者囊嘉特之弟囊嘉特遣使招之布哈台不從斬  
其使 中書省臣言朝廷賞賚不宜濫及罔功鷹鷂獅  
豹之食舊支肉價二百餘錠今增至萬三千八百錠控  
鶴舊止六百二十八戶今增至二千四百戶又佛事歲  
費以今較舊增多金千一百五十兩銀六千二百兩鈔  
五萬六千二百錠幣帛三萬四千餘匹請悉東汰從之

壬午周王遣常侍博囉及特節齊先至京師賞以金幣居宅仍遣內侍屯嘉琿如周王行在所 乙酉薩題等見周王于行幄致命辭勸進 播州楊萬戶引四川賊兵至烏江峰官軍擊敗之八番元帥托爾楚亦破烏江北岸賊兵復奪關口諸王伊魯特穆爾統軍五萬五千至烏江與托爾楚會囊嘉特焚雞武關大橋又燒絕棧道丙戌周王即皇帝位于和寧之北是為明宗扈行諸王大臣咸入賀乃命薩題遣人還報京師已而布哈實哩

等輦金銀幣帛至遂遣縑絮等還京師帝命之曰朕弟  
曩嘗覽觀書史邇者得無廢乎聽政之暇宜親賢士大  
夫講論史籍以知古今治亂得失卿等至京師當以朕  
意諭之 奉元蒲城縣民王顯政五世同居衛輝安寅  
妻陳氏河間王成妻劉氏冀寧李孝仁妻寇氏濮州王  
義妻雷氏南陽郊二妻張氏懷慶阿魯輝妻翟氏皆以  
貞節聞並旌其門 二月己丑曲赦四川囊嘉特 庚  
寅大都復以雅克特穆爾為中書右丞相監修國史知樞

密院事餘如故 辛卯御大明殿冊命皇后鴻吉哩氏  
壬辰宣靖王邁努自大都來覲于行在 癸巳大都  
遣翰林侍講學士曹元用祀孔子于闕里 囊嘉特據  
雞武關奪三义柴關等隘以書誘鞏昌總帥汪延昌又  
進兵至金州據白土關陝西行省督軍禦之大都樞密  
院言囊嘉特阻兵四川其亂未已請命鎮西武靖王吹  
巴勒等皆調軍以湖廣行省官托歡布色博囉及鄭昂  
霄總其兵進討從之戊戌命察罕諾爾宣慰使薩題勒

密實將本部蒙古軍會鎮西武靖王等討四川 頒行

農桑輯要及栽桑圖 辛丑大都中書省議追尊皇妣

伊奇哩氏曰仁獻章聖皇后唐古氏曰文獻昭聖皇后

丙午囊嘉特分兵逼襄陽湖廣行省調兵鎮播州及

歸州 辛亥大都諭廷臣曰薩題還言大兄已即皇帝

位凡二月二十一日以前除官者速與制勅後凡銓選

其詣行在以聞 廬州路合肥縣地震 壬子命有司

造行在帳殿 癸丑諸王伊魯特穆爾等至播州招諭

土官之從囊嘉特者楊伊埒布哈及其弟等皆來降

大都立奎章閣學士院秩正三品以翰林學士承旨和  
塔拉都哩默色集賢大學士趙世延並為大學士侍御  
史薩題翰林直學士虞集並為侍書學士又置承制供  
奉各一員遣使以除目奏于行在帝並從之 三月戊  
午朔帝次格根察罕之地 辛酉大都遣右丞相雅克特  
穆爾奉皇帝寶于行在所御史中丞巴濟拉知樞密院  
事圖勒噶特穆爾等各率其屬以從復命有司以金銀

幣帛詣行在所以備賜予因謂其廷臣曰寶璽既北上  
繼今國家政事其遣人聞于行在所 癸亥大都命有  
司造乘輿服御北迎大駕 大都改潛邸所幸諸路名  
建康曰集慶江陵曰中興瓊州曰乾寧潭州曰天臨  
丙寅伊埒特穆爾自行在還大都諭旨曰朕至上都宗  
王大臣必皆會集有司當備供張上都積貯已為都爾  
蘇所耗大都府藏聞亦悉虛供億如有不足其以御史  
臺司農司樞密宣徽宣政等院所貯充之 戊辰雲南

諸王達實布哈圖沁布哈及行省平章默古斯等集衆  
五萬數丞相額爾吉訥專擅十罪將殺之達實布哈遁  
走八番達實布哈僞署參知政事等官 己巳大都命  
改集慶潛邸建大龍翔集慶寺以來歲興工 夏四月  
壬辰大都命浚潞州漕運河 癸巳雅克特穆爾見帝于  
行在率百官上皇帝寶帝嘉其勲拜太師仍命為中書  
右丞相錄軍國重事達爾罕太平王餘並如故復諭雅  
克特穆爾等曰凡京師百官朕弟所用者並仍其舊卿等



其以朕意諭之雅克特穆爾奏陛下君臨萬方國家大事  
所繫者中書省樞密院御史臺而已宜擇人居之帝然  
其言以武宗舊人哈巴爾圖為中書平章政事前中書  
平章政事拜特穆爾知樞密院事常侍博囉為御史大  
夫 甲午立行樞密院命昭武王知樞密院事和斯領  
行樞密院事賽音特穆爾邁努並同知行樞密院事是日  
帝宴諸王大臣于行殿雅克特穆爾哈巴爾圖拜特穆爾  
博囉等侍帝特命臺臣曰太祖皇帝嘗訓飭臣下云美

色名馬人皆悅之然方寸一有繫累即能壞名敗德卿等居風紀之司亦嘗念及此乎世祖初立御史臺首命塔齊爾蘇特穆爾二人協司其政天下國家譬猶一人之身中書則右手也樞密則左手也左右手有病治之以良醫省院闕失不以御史臺治之可乎凡諸王百司違法越禮一聽舉劾風紀重則貪墨懼猶斧斤重則入木深其勢然也朕有闕失卿亦以聞朕不以責也 乙未特命博囉等傳旨宣諭雅克特穆爾巴勒達實和斯哈巴

爾圖巴濟拉等曰凡省院臺百司庶政詢謀僉同標譯  
所奏以告于朕軍務機密樞密院當即以聞毋以夙夜  
為聞而稽留之其他事務果有所言必先中書院臺其  
下百司及贊御之臣毋得隔越陳請宜宣諭諸司咸俾  
聞知儻違朕意必罰無赦 丁酉以陝西行臺御史大  
夫雅克特穆爾為上都留守 己亥湖廣行省參知政事  
博囉奉詔至四川赦囊嘉特罪囊嘉特等聽詔蜀地悉  
定諸省兵皆罷 癸卯遣使如京師卜日命中書左丞

相特穆爾布哈攝告即位于郊廟社稷遣武寧王齊齊克圖平章政事哈巴爾圖立皇弟圖卜特穆爾為皇太子仍立詹事院罷儲慶司以薩里特穆爾為中書平章政事科爾結為中書右丞乙巳監察御史言嶺北行省控制一方廣輪萬里實為太祖肇基之地國家根本繫焉方面之寄豈可輕任平章達喇齊素非勲舊奴事都爾蘇屈起宿衛輒為右丞俄陞平章年已七十眊昏殊甚左丞瑪魯本晉邸部民以女妻都爾蘇引為都水遂

除左丞郎中羅壘市井小人圖固勒乃晉邸衛卒不諳  
政務並宜黜退臺臣以聞帝曰御史言甚善其並黜之  
又諭臺臣曰御史劾嶺北省臣朕甚嘉之繼今所當言  
者毋有所憚被劾之人苟營求申訴朕必罪之或廉非  
其實毋輒以聞 五月丁巳朔帝次都爾伯珍之地  
是日皇太子賜雅克特穆爾父祖紀功碑銘 戊午遣西  
安王喇特納實哩仍還大都 己未皇太子遣翰林學  
士承旨額哩音特穆爾來迎大駕 庚申帝次鄂勒歡水

東 癸亥次必里克圖之地 是日皇太子復遣翰林  
學士永旨鄂爾多來迎大駕 乙丑命有司給行在宿  
衛士衣糧及馬芻豆 庚午帝命雅克特穆爾陞用嶺北  
行省官吏其餘官吏並賜散官一給選用潛邸舊臣及  
扈從士受制命者八十有五人六品以下二十有六人  
甲戌皇太子命中書省臣擬注中書六部官奏于行  
在所 壬申次阿魯圖罕之地 以衆嘉努為御史中  
丞 乙亥次圖古勒敕大都省臣鑄皇太子寶時求太

子故寶不知所在近侍拜布哈言寶藏于上都行幄遣人至上都索之無所得乃命更鑄之 丁丑皇太子祭京師迎大駕鎮南王特穆爾布哈及諸王駙馬扈衛百官悉從行戊寅市馬二百八十疋載乘輿服御送行在所 六月丁酉陞都督府為大都督府 壬寅戒近侍毋得輒有奏請 庚戌皇太子次于上都之六十店

辛亥帝次哈喇哈納圖之地詔諭中書省臣凡國家錢穀銓選諸大政事先啓皇太子然後以聞 陝西行

臺御史孔思迪言人倫之中夫婦為重此見內外大臣  
得罪就刑者其妻妾即斷付他人似與國朝旌表貞節  
之旨不侔夫亡終制之令相反況以失節之婦配有功  
之人又與前賢所謂娶失節者以配身是已失節之意  
不同今後凡負國之臣籍沒奴婢財產不必罪其妻子  
當典刑者則孥戮之不必斷付他人庶使婦人均得守  
節請著為令 壬子海運糧至大都凡百四十萬九千  
一百三十石 是月皇太子賜鳳翔府岐陽書院額書



院祀周文憲王仍命設學官春秋釋奠如孔子廟儀

秋七月丙辰朔日有食之 自六月壬子雨至是日乃止 己未皇太子更定遷徙法凡應徙者驗所遠近移之千里在道遇赦皆得放還如不悛再犯徙之本省不毛之地十年無過則量移之所遷人死妻子聽歸土著著為令 壬申監察御史巴勒丹伊實言朝廷自去秋命將出師戡定禍亂其供給軍需賞賚將士所費不可勝計况冬春之交雪雨愆期麥苗槁死秋田未種民庶遑

遑流移者衆臣伏思之此正國家節用之時也如果有功必當賞賚者宜視其官之崇卑而輕重之不惟省費亦可示勸其近侍諸臣奏請恩賜宜悉停罷以紓民力臺臣以聞帝嘉納之仍勅中書省以其所言示百司

癸酉太白經天 丙子皇太子受新寶 辛巳冀寧陽

曲縣雨雹大者如雞卵 八月乙酉朔帝次翁果察圖

之地丙戌皇太子入見是日宴皇太子及諸王大臣于行殿庚寅帝暴崩年三十葬起輦谷皇太子入臨哭盡

哀雅克特穆爾以皇后命奉皇帝璽寶授皇太子

胡粹中曰聞之故老言雅克特穆爾奉上璽綬明宗從  
官有不為之禮者雅克特穆爾且怒且懼既而帝暴崩  
雅克特穆爾聞哭聲即奔入帳中取寶璽扶文宗上馬  
而馳本紀乃言皇太子入哭盡哀以皇后命奉皇帝  
寶授于太子其說不合豈當時忌諱有不敢明言者  
歟

皇太子疾驅而還雅克特穆爾從行晝則率宿衛士以扈

從夜則躬探甲冑繞幄殿巡護壬辰次博囉察罕以巴  
延為中書左丞相依前太保奇徹台阿爾斯蘭哈雅趙  
世延並中書參知政事甘肅行省平章多爾濟為中書  
右丞中書參議阿榮太子詹事丞趙世安並中書參知  
政事前右丞相達實特穆爾知樞密院事特穆爾布哈  
及上都留守特穆爾圖並為御史大夫 宣政院使和  
和聞明宗崩流涕不能食自是杜門不出者數年以疾  
卒和與弟庫庫皆為時之名臣世號為雙壁皆博果

密之子也 癸巳皇太子至上都雅克特穆爾遜與諸王

大臣仍勸復正大位 丙申流諸王呼喇珠于海南

戊戌四川囊嘉特以指斥乘輿坐大不道棄市 己亥

皇太子復即位于上都之大安閣是為文宗詔曰晉邸

違盟構逆據有神器天示譴告竟隕厥身於是宗戚舊

臣協謀以舉義正名以討罪揆諸統緒屬在眇躬朕興

念大兄播遷朔漠以賢以長歷數宜歸力拒羣言至於

再四乃曰艱難之際天位久虛則衆志弗固恐隳大業

朕雖從請初志不移是以固讓之詔始頒奉迎之使已遣尋命喇特納實哩雅克特穆爾奉皇帝寶璽遠迓於途受寶即位之日即遣使授朕皇太子寶朕幸釋重負寔獲素心乃率臣民北迎大駕而先皇帝跋涉山川蒙犯霜露道里遼遠自春徂秋懷艱阻於歷年望都邑而增慨徒御弗慎屢輿節宣信使往來相望於道路彼此思見交切於衷懷八月一日大駕次翁果察圖朕欣瞻對之有期獨兼程而先進相見之頃悲喜交集何數日

之間而宮車弗駕國家多難遽至於斯念之痛心以夜  
繼旦諸王大臣以為祖宗基業之隆先帝付託之重天  
命所在誠不可違請即正位以安九有朕以先皇帝奄  
棄方新惻怛何忍銜哀辭對固請彌堅執誼伏闕者三  
日皆宗社大計乃以八月十五日即皇帝位於上都可  
大赦天下 辛丑立寧徽寺掌明宗宮分事壬寅以鈔  
萬錠幣帛二千匹供明宗皇后班布爾實費用 乙巳發  
諸衛軍浚通惠河 丙午自庚子至是日晝霧夜晴

丁未以特們德爾為上都留守特們德爾前為陝西行臺侍御史坐塗毀詔書得罪以其兄巴延有功故特官之 己酉車駕發上都 庚戌改詹事院為儲政院以巴延兼儲政院使 河東宣慰使哈剌撒託朝賀為名歛所屬鈔千錠入已事覺雖會赦仍徵鈔還其主勅自今有以朝賀歛鈔者依枉法論罪 甲寅監察御史劾前丞相拜布哈昔以贓罷天歷初因人成功遂居相位既矯制以瑪魯家貲賜平章蘇蘇又與蘇蘇等潛呼日者



推測聖算今奉詔已釋其罪乞竄諸海島以杜姦萌帝  
曰流竄海島朕所不忍其并妻子置之集慶加封大  
都城隍神為護國保寧王夫人為護國保寧王妃景  
州舊縣尹呂思誠差民戶為三等均其徭役刻孔子像  
令社學祀事每歲春行田樹畜勤敏者賞以農器人爭  
趨事地無遺力民石阿爾等流離積年至是聞風復業  
印識文簿畀社長藏之季月報縣不孝弟不事生業者  
悉書之罰其輸作胥吏至社者何人用飲食若干多者

責償其直豪猾者竄名職田戶思誠盡祛其弊嘗買羊  
劉智社民李甲持酒來見懇其弟匿羊思誠叱之退王  
青兄弟四人友愛彌篤思誠至其家取酒勸酬懽同骨  
肉李之兄弟相謂曰我等終不敢見尹矣各具酒食相  
切責悔前過析居三十年復還同爨鎮民張復叔母孀  
居且瞽丐食以活恐思誠聞之即日迎養思誠憐其貧  
令為媒互人以養之天旱道士持青蛇曰妻實克小青  
謂龍也禱之即雨思誠以其惑人殺蛇逐道士雨亦隨

至遂有年縣多淫祠動以百餘計刑牲以祭者無虛日  
思誠悉命毀之唯存江都相董仲舒祠



資治通鑑後編卷一百六十九